

Pedrõ ha katxu hatu kene bumanikiaki

2 PEDRO

Pedrõ hatukiri xinãnikiaki, na hãtxarã

1 ¹ Ë Simão Pedro Jesus Cristõ tsuma hawẽ kuxipaya ea waniki. Nukũ mekenika Deus Jesus Cristõ kaneisma nũ ikũwaĩbu keska mã nuku txibãkĩ ikũwãriaibuwẽ taeshũ ã matu kene bumai uĩrakãwẽ. ² Deus inũ nukũ Shanẽ Ibu Jesus haibuwakĩ mã hatu unãhairaya unãnuma matu hiwemakĩ matu duawatxakayamai bikubaĩkãwẽ.

Deusũ katuaburã, ewatikiaki, na hãtxarã

³ Deus kuxipa paepatũ haska hatũ abuai keska hawẽ hiwekĩ nũ hakiri xinãkubainũbũ nuku inãki, Jesus Cristo nũ ikũwãyã Deusũ nuku kenatã hawẽ daya pepa nũ hayashanũbũ hawẽ kuxipa meribiwẽ nuku katukinã. ⁴ Na haska tibi nuku amairã, haska bebũkiri Deus ibubis hãtxai hawẽ kuxipahairawẽ yubakani txanima betsa waisma haska ikũwãkĩ mã xinã betsa watã mã ma Deusũ beya ibu wawẽ taea na mai anushũ txakabu kemu paewẽ ikaibu hatu binui mã ma Deusunabu pashatirubuki.

⁵ Haskawẽ taea mã ikũwaĩ kuxipakĩ eska tibiwẽ ana matsãkĩ binumakubaĩkãwẽ. Jesus Cristo ikũwaĩ matũ xinãwẽ pe hiwekubaĩkãwẽ. Ana Deusũ kakape nĩka pehairawatã ⁶ ibubis matũ yurakiri xinã pewatã mekekubaĩkãwẽ. Haskai mã hĩ hĩ imis tapĩ beshtekekubaĩkãwẽ. Haskai Deusbe mã haibunamehairai ⁷ matubetã ikũwaĩbube haibunãĩ beyanamei haska tibiwẽ nuii hiwekubaĩkãwẽ.

⁸ Mã haska tibi haya mã hawẽ ewairã, txanima nukũ Shanẽ Ibu Jesus Cristo unãkĩ mã hamẽ haibuwamaki. Ha inũ, matũ hiwearã, hamẽmari ishanikiki. ⁹ Hakia tsuabura haskakubainabumarã, bekũmã hawẽ hiwea haskashanai unãtiruma keskabuki. Deusũ hatũ txakabu ma hatu buashũbiani ana habũ xinãkatsi ikama hakimatã Deuskiri ana

xinābumaki. ¹⁰Ē betsbabu inū ē puibuū, Deusū matu kenashū katutā hawena meribis matu wakatsis iniki. Mā hawenabu heneama ikatsis ikaiburā, txanima ikūwaī mā haki nukukatsis ikai matū xinā mestētā ikubaīkāwē. Haska tibi ē matu yunuai keskairā, mā haskakubainairā, babui txakabuwē taea kanei mā txītuāma ishākanaii. ¹¹Mā haskai hiwekubainairā benimakī matu kēwātxakayamakī hawē mae bena anu hanu mā hikinū hawē beputi matu bepēshūtā: “Neri hiki bekāwē”, matu washanikiki, hanu nukū mekenā Shanē Ibu Jesus Cristō matu bitxikinā, niti ikama mā habe hiwepakeshanūbunā.

Deusū hātcharā, hamēmakiaki, na hātcharā

¹²Ma bebūkiri txanima hātcha matu yusiabu unākī mā mestēwani mā hawē hiwea haska dasibi matukiri xinākī eāri matu xināmakī ē henekatsi ikamaki. ¹³Natiā ē hiweyuarā, txanima haska ē xināmis na hātchawē matu e imakī matū xinā ē ana matu mestēwamakatsis ikai ea nīkakāwē. ¹⁴Nukū Shanē Ibu Jesus Cristō ma hanu ea yuini ma ē mawashanairā, ma kemaikiki. ¹⁵Na eska matu ashūkinā, ma ē mawaimakē haska xinākī Jesus Cristokiri yusia mā ana xinākubaīshanūbū ē matuki shabakabi txaniai.

¹⁶Nukū Shanē Ibu Jesus Cristo kuxipahairai ana hushanaikiri shabakabi matu yusikī hawē beparāti miyui hawērua nū matu yuiama iniki. Hakia nukū Shanē Ibu kuxipai txashahairai ibubis nukū beruwē uīnishū matu parāma nū matu yuiniki. ¹⁷Hawē Epa Deusū kēwākī kuxipa wai nū uīayā haskabiama Deusū hawē hui tashnimakī hawē bake pepa wakī hātcha wakī yuikī: “Narā, ē bakeki. Ē abuhairaii, ē Katuarā”, ikai ¹⁸hawē hui nai anua huai nukubū nū nīkaniki, nukū Shanē Ibu ha mati meribi anu habe nū mapuabunā.

¹⁹Haska wakī Deusū hātcha yuishunikabu hawē bakekiri hatu kenemani hanu shabakabi Deusū nuku unāmakī keyuniki. Haska ha hakiri kenenibu txanimaki, xinaīrakāwē. Haskakiri mā tapīkubainairā, matū hiwea mā pewakubainai hanu nukū Shanē Ibu huaitiā dasibi matū hiwea matu betsahaira washanikiki. ²⁰⁻²¹Haskawē taea Deusū hātcha yuishunikaburā, hatūmebi hatū xinānē hātchataskama hakia Deusū hawē hātcha hatu yuimaya Yushī Papatū hatu merabewakubainikiaki. Haskarā, txanimaki. Haska wakī Deusū hatu yusikī kenemaniwē taeshū haska Deusū hatu yusīmani keska wakī hatu yusīriakubaīkāwē. Na hātcha ē matu yuairā, hakimayamakubaīkāwē.

Yusinā parananāmisbu eskashākanikiaki, na hātcharā

2 ¹Israelbu ē shenipabu anu Deusū hātcha yuishunika matxupa naxui ika hayanibuki. Habiaskariai matu anuri yusinā matxupa matu naxui iria hayabuki. Habu hatū hātcha hawēruabia hatū xinā txakabuwē

matu daũkĩ akawakanikiki, nukũ Shanẽ Ibũ ma nuku meketi pewabianikẽ hawẽ kuxipa danaĩ parananaĩburã. Haska matu yusĩkĩ husiaibu Deusũ hawaira hatu kupishanikiki. ²Hatũ hiwea kemu pae hamapai txakabuwẽ ikaibu yura itxapabũ hatu txibaĩ Jesus Cristõ bai txanimabiakẽ hawẽ taea ikũwaĩbu yuaĩ hãtxa txakabukanikiki. ³Habunã, matũ pei itxapa binũ ishũ txani hãtxa yusĩkĩ matu parãkĩ itxakawashãkanikiki. Haskanũbariaibu ma bebũkiri Deusũ hatu kupini hawa betsa waismawẽ taeshũ tsuã Deus hatu daewashũtirumawẽ taeshũ Deusũ hatu kupikatsi manayuikiki.

⁴Hawẽ nai tsumabu hatiritũ hawẽ hãtxa nĩkabuma hatũ txakabu Deus hakimakatsi ikama hakia mai kini keyatapa shãkĩhaira mexu merã hanua pashatirubuma anu hatu putatã neshashũ hatu mekeyunikiaki, txipu hanu kupiaitiã hatu unãti wakatsirã. ⁵Ha dikabi Noẽ hiweatianã, ha mai ha dukũ damiwani anu yurabu txakabubu kupinũ, iwanã, hatũ txakabu hakimakatsi ikama Deusũ hene yunushũ habu hasai keyuaibũ Noẽ pashashanũ ika hawẽ hiwea txakabu buama Deuskiri besti txanikũkaĩkĩ hawẽ yurabu sete besti habube pashaya hanua habuã Noẽ hãtxa nĩkakĩ Deus nĩkaisbuma hatũ txakabuwẽ hasai keyunibukiaki. ⁶Natiã tsuabũra hawẽ hãtxa nĩkama txakabukubainaibu Deusũ hatu kupishanai hau bebũkiri dasibi txakabumisbũ Deusũ eskaibu hatu kupini hau hakiri unãshanũbũ mae dabe Sodoma nawabu inũ Gomorra nawabu kupikĩ txiwẽ hatu menu keyukĩ Deusũ hatu yamawakĩ mapu besti hatu wanikiaki. ⁷⁻⁸Deusũ hatu haska waitiã Sodoma anu Abraãonẽ berẽ Ló nawabube hiweshũ hatũ txakabuwẽ betsa betsapaibu hatube naxui ika hiweshũ bari tibi haskaibu uĩ inũ habu nĩkai hatũ txakabuwẽ taea huĩti nixma haska washũ hatu merabewatimakẽ txutaname bestinũ ika kemukĩ Ló bikawaibũ hatu kuariama Ló huni pepakẽ Deusũ pashawanikiaki.

⁹Noẽ inũ Ló Deusũ pashawanishũ tsuabura hawenabu ikatsis ikĩ hatũ hiwea Deus inãmisburã, hawẽ taeshũ hawara bika tibi hatu memabiaibũ nukũ Shanẽ Ibũ unãkĩ hatu txakabu binumariakubaĩtiruki. Hamẽ habu txakabumisburã, hanu bari hawẽ heneaitiã hatu unãti watã hatu kupishanai unãriaikiki. ¹⁰Nukũ Shanẽ Ibuã hatu kupikinã, habu dasibibu hatũ kemu pae heneisbuma inũ hawẽ kuxipa danãkubainaibu hatu ashanikiki. Habu yusĩnanaĩ parananaĩmisburã, huĩti kuxitã tsua nĩkaisma inũ kãkĩ xinã betsa wakatsi ikabuma hawaki dateama hatũ hãtxawẽ yushĩ txakabu hatũ shanẽ ibuya hatu itxakĩ ha amisbuki. ¹¹Hakia Deusũ nai tsumabu kuxipa yununikabũ hatu binũbiashũ hatũ kuxipa uĩmakĩ hatukiri yuikĩ Satanás hawẽ tsumabuya hatu txitekĩ ha aisbumakiaki, Deus hãtxashũkinã.

¹²Ha hunibu parananaĩmisburã, hawa nĩkati kayabi hayabumaki, yuinakapã xinãyã keskaburã. Yuinakarã, txanima hawẽ nĩkatinĩs hiweabuki, tsuãra atxishũ deteshũ pimisbu inũ pisbumarã. Ha

parananāmisbu haska keskabuki. Deusū bai kayatapiakiri unã pewamabia hakiri hãtxatxakamisbuki. Hakia haskabu mawairã, yuinaka deteabu imis keskashãkanikiki. ¹³Habuã dukū yura betsabu nuitapawaxina habuwẽ taeshū Deusū hatu manakukī kupia nuitapahairariashãkanikiki. Habu parananãkī habū xinaī shabakabi hamapai txakabu aki: “Nū benimakūkainaii”, iki hiweshū mã ikūwaību beyusai anu matu naxui itã matube benimawanū ika mã hawẽ dakeai habū matu husimakī atimapa tibi wakī matu dabīwāmisbuki.

¹⁴Ha parananāmisbunã, hatū kemu paewenã, aību tibi ha abuai kasmai ha itxakawa bestikatsis ikai hatu amisburã, haskawẽ taea hatū txakabu itxapa mataki, hawa henetirubumarã. Hatū kemu paewẽ ikūwaī huīti babubu parākī hatu txakabuwamamisbuki. Hatu haska wamamisbu hatū kemu pae heneisbumarã, habis ha hunibu Deusū unãtã hatu kupishanikiki. ¹⁵Haska Beorī bake Balaão ini keskai hatu uĩmatxakai pepa ana txibãma haki petxitã kanei hatūmebi benukī ha parananāmisbū Deusū hãtxa ana nīkabumaki. Hamẽ Deusū hãtxa hatu yuishūbiamis Balaão peiwẽ kemukī Deusunabu yupukī txakabuwapanã ¹⁶Deusū hãtxa xinãma kaneaya hawẽ burro hãtxaismabia hunī hãtxawẽ yuimakī Balaão tatima ikaskaini kapanã hawẽ burrõ hãtxawẽ nemakī Deusū kūyã anikiaki.

¹⁷Ha yusīnã paranāmisburã, ũpash bana tashka heneuma keska inū nai kuī niweya bebiai uiuma hawa txa akama keskabuki, hatū yusīa hawa pepa hayamarã. Ha habu haskamisburã, Deusū hatu kupia ikibi ika meirã, hanu mexu tẽ ikihairai anu hatu putashanikiki. ¹⁸Hawara hãtxakī yuiaibu hawērua kemutapabia hamēki. Habū dama ikūwākī taewaxina mestēriabuma ha txakabukiri yusīkī txanima hãtxa hatu henemakanikiki, hatū yura atimapa betsa betsapatikiri hatu yusītxakakinã. ¹⁹Habu txakabū hatu tsumawawẽ taea ha hunibū hawa hatu nematirubumaki, ha ikūwākī taewaibū akaiburã. Nuku tibirã, hatū nuku mekearã nū hawẽ tsumawẽ taea ha parananāmisbū tsumarã, txakabu bestiki, tsuã danãkī henetirumarã. ²⁰Ha dukū Nukū Shanē Ibu mekenã Jesus Cristo unãtã hatū txakabu putakī pewabiani habias txakabū ana hatu atxishū yabuarã, beshmas ibiani ana txakabui pikuhairamisbuki. ²¹Ha dukū Jesus Cristo txibãti unãma ikaiburã, mawaira txakabuma ikeãkanaii. Hakia Deusū hãtxa meribi hatu yusīabu unãtã ana txibãkatsi ikama danãkī henei txakabui pikukubaĩmisbuki. ²²Ha panananāmisbu haskakiri hatu yuini txanima habiaskakanikiki. Uĩrakãwẽ. “Kamã hanãtã txītūkīrã ana hawēri pimisbuki. Ha inū, ina yawa pupushaira datxukī shūpīwābiabu ana txītūkaī pupuski irumai ana hawẽ meweki pukumiski.” Haska ã matu yuiaī keskakanikiki, txakabui ana pikuirã.

Nukū Shanē Ibu ana hushanikiaki, na hãtxarã

3 ¹Ë betsabu inū ã puibuū, matuwẽ nuikī ana ã matu keneshunairã, eskawẽ taeshū ã matu ashuaii. ²Xinãkãwẽ. Uatiã Deusū hãtxa

yuishunika meribibũ yusĩnibu inũ ha dikabi nukũ Shanẽ Ibu mekenã hãtxa nuku yununi habias hawẽ kuxipayabũ matu yusĩkubainaibu hakimayamakubaĩkãwẽ.

³Na haska dasibi ẽ matuki txaniai mã bebũkiri unãtirubuki. Txanima hanu bari hawẽ henei ma kemaya yurabu hiwe txakashũ ibubis txakabu xinãkĩ mã ikũwaĩbu matuki kashei ẽ hẽ ibiai ⁴yuka ikĩ: “Cristo yubakai: ‘Ë ana hushanaii’, ikainirã, hania? haska mã txanimisrã. Nukũ ibubũ nĩkabaini ma mawanibuki. Haskabia Deusũ mai bawani anu nũ hiwea habiaskas kaikiki”, ikĩ matu yukakubaĩshãkanikiki. ⁵Bebũkirihaira iki taenitiã Deusũ nai inũ mai hawẽ hãtxawẽ damiwakĩ tashnima ha dabe henesbiakẽ nai inũ mai pashkakĩ hene anua mai tashnimatã mekebianikẽ ha yurabũ Deuskiri hawa xinãkatsi isbumaki. ⁶Ana bari itxapahaira kakẽ habias heneiwẽ mai hirabi atximakĩ hiweabu tenãkĩ keyunikiaki. ⁷Hakia nai inũ mai natiã hayayuarã, habiaskari wakatsi Deusũ mekeyukubainikiki. Hanu bari hawẽ henei keyuaitiã unãti wakĩ yura txakabubu kupikatsi Deusũ hawẽ hãtxawẽ yunukĩ nai inũ mai txiwẽ yamawakĩ habũ Deus danãmisbu hanu hatu benu keyushanikiki.

⁸Ë betsabu inũ ẽ puibuũ, eskakiriri ẽ matuwẽ nuiãi xinãkubaĩkãwẽ. Shaba tanakĩ ano tanariai mã hawẽ dabanã ikũkaĩmiski. Hakia Jesus Cristõ haska xinaĩsmaki. Shaba bestitxai hawaira keyumis inũ 1.000 ano kabiaya nukũ Shanẽ Ibu hawẽ nuismaki. Ana hakimayamashãkãwẽ. ⁹Hanu Jesus huti wani ma binuaya habũ xinãtxakai hãtxamisburã, eskaki, xinãkãwẽ. Nukũ Shanẽ Iburã, matuwẽ taearã, hĩ hĩ ikamaki. Dasibibu Deuskiri xinã betsatã hau benui mawa kayabi iyamashanũbũ tenetã matu manakai ikũkainikiki.

¹⁰Hawatiãra nukũ Shanẽ Ibu huirã, tsuã ana hakiri xinãmakẽ yumetsu hua keskanũbarikiaki. Hanua kanatũ itxakayamai keskawẽ nai anu yamawakĩ habũ tsumabauna txi kuxipahairawẽ menukĩ mai hirabiri damiwani kupikĩ yamawashanikiki.

¹¹Haska dasibi Deusũ yamawashanai mã unaĩwẽ taea natiã mã hiweyuarã, haska Deusũ abuai keska aki meribi pepai hiwepakekãwẽ. ¹²Hanũ hau Deusũ yurabu kupiyunũ manama hawaira hawẽ bakekiri kakape txanikĩ yuibaũkãwẽ, hau samama hurinunã. Hanu ana manama hukiã, nai txiwẽ menuaya ha habuã tsuma txĩ menukĩ metesha niri ishanikiaki. ¹³Nukubunã, eska uĩkatsi nũ manakanaii. Nai inũ mai bena Deusũ ma nuku bebũkiri yubanirã, ha haska tashnirã, kaneisbuna inũ pepabuna besti ishanikiki.

¹⁴Ë betsabu inũ ẽ puibuũ, ẽ matuwẽ nui heneama ẽ matu yusĩkubainai eskakiri xinãkãwẽ. Hau dasibi mã hawa detsisma inũ hawa txakabu hayama inũ unãnuma mã hiwe bestikẽ hau Jesus Cristo matuki nukuyushanũ ẽ matu yusĩshu xinaĩ hakimama manakakubaĩshãkãwẽ. ¹⁵Xinaĩrakãwẽ. Nukũ Shanẽ Ibu nukuwẽ nui hĩ hĩ ikama pewẽ nuku

pashawakatsi nuku merabewaikiki. Habiaskiri nukū betsa Paulō matu keneakeakeshūyamaki, Deusū merabewaya unānepakinā. ¹⁶Paulō kene betsa tibi anu yusīa bikabiakē na haska ē matuki txaniai keska betsabū nīka pewama inū huīti babū ikūhairawabumā Paulō hātxa maewakī inū Deusū hātxa kenenibu maewakeakei ibubis hatūmebi txakabutā benushākanikiki.

¹⁷Ē betsabu inū ē puibuū, matuwē nuihairakī ma bebūkiri haskashanaibu ē ma matuki txanishuki. Mekeirakubaikāwē, mā pebiakainaya hau huni txakabū matu parākī hau matu txītūmayamashanūbū mestēshākāwē. ¹⁸Hakia nukū mekenā Shanē Ibu Jesus Cristo ana unākī beyahairawai hawē nuiwē ewakubaikāwē. Harā, dasibibū Jesus kēwākī heneama hau apakenūbūwē. Haskakirā.

Hatiski, ē hātcharā.

Pedro